



Inatsisartunut ilaasortaq Karl Lyberth, Siumut
Inatsisartut
/MAANI

Aqutsisoqarfik Uummannami qaleralinnut pisassiissutit aalajangerneqarnerannut tunngavigineqartoq pillugu § 37 naapertorlugu apeqqummut nr. 2011-114-mut akissuteqarneq

Inatsisartut suleriaasianni § 37 malillugu aqutsisoqarfik Uummannami sinerissap qanittuani qaleralinniarnermut pisassiissutit aalajangersarneqarnerat pillugu apeqquteqarputit. Apeqqutigineqartut uannit akineqartussanngorlugit ingerlateqqinneqarsimapput.

30. maj 2011
Sagsnr. 2011-050537
Dok. Nr. 643388

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nаноq.gl
www.nanoq.gl

Naalakkersuisunut apeqqut:

Aqutsisoqarfik Uummannami qaleralittassat suna imaluunniit suut tunngavilersuutit aalajangiisuutillugit aqutsisoqarfinnut allanut sanilliullugit ikinnerutinneqarpat?

Akissut:

Apeqqutigineqartup akineqarnissaanut atatillugu Aalisarnermut, Piniarnermut Nunalerinermullu Naalakkersuisoqarfik Pinngortitaleriffimmut saaffiginissimavoq.

Pinngortitaleriffik tassunga atatillugu nalunaarpoq sinerissap qanittuani aqutsisoqarfinni pingasuusuni tamani qaleralinniarnermi biologit siunnersuineranni uuttuutit marluk atorineqartarmata, tassalu paasissutissat aalisartuneersut kiisalu biologit angallat Adolf Jensen atorlugu ukiuni arlaqartuni misissuisimanerannit paasissutissat. 2008-miilli angallatini 30 fod qaangerlugu angissuseqartuni aalisartut peqquneqarsimapput logboginut nalunaarsuisassasut, taakkunanngaanniillu aalisarnermut paasissutissat aamma piniarneqartarput.

2011-mut Uummannamut siunnersuinermi 5.000 tonsit aalisarneqartussatut inassutigineqarput, taakkulu aalisartuniit biologillu misissuisimanerannit paasissutissat tunngavigalugit aalajangersarneqarput. Pinngortitaleriffiup tassunga atatillugu nalunaarutigaa misissuineri takuneqarsinnaasoq Uummannap eqqaani qalerallit agguaqatigiissillugu angissusaat 74 cm.-imiit 64 cm.-imut appariarsimapput (takuuk ilanngussa 1). Tassuuna erseqqissumik takuneqarsinnaavoq aalisakkat pisarineqarnerminni milligaluttuinnartut. Ineriartorneq tamanna qaleraleqassuseq ataatsimut isigalugu ajortumik takussutissatut ersersitsivoq.

Aammattaaq nalunaarutigissavara 2011-mi aasakkut aallartittumik aqutsisoqarfik Uummannami sukumiinerusumik misissuinerit aallartinneqarnissaat Pinngortitaleriffiup pilersaarutigimmagu. Misissuinerit aallartittussat qaleraleqassutsip pitsaanerusumik takuneqarsinnaalernissaanut iluaqutaanissaa ilimagineqarpoq. Tassunga atatillugu aamma nalunaarutigissavara Pinngortitaleriffiup erseqqissaatigimmagu sukumiinerusumik misissuinerit tamakku imaangitsoq aalisagaqarneruleraneramik takuuitsuussasut. Aamma akerlerluinnaanik angusaqartoqarsinnaavoq, tassalu

massakut ilimagisatsinniit qaleraqannginnerunissaa. Kiisalu oqaatigineqassaaq aqutsisoqarfiit pingasuusut taakku immikkut tamarmik siunnersuiffigineqartarmata. Tamanna isumaqarpoq pisassiissutinik aalajangersaanermi inassutigineqartut sumiiffimmiit sumiiffimmut aamma assigiinneq ajormata.

Inussiarnersumik inuulluaqqusillunga

Ane Hansen